

Prome Minister Mike Eman

Drechamento di caminda pa Parke di Luz Warawara ta un promesa cumpli

ORANJESTAD – Den transcurso di diahuebs mainta y apesar di un agenda preta di compromiso; Prome Minister Mike Eman a tuma tempo pa bishita Parke di Luz di Warawara. Algun luna atras a bishita e vecindario caba en cuadro di Accion BoBario, pero na e ocasion aki el a bin pa aprecia pa su mes, pero hunto cu bisiñanan, e resultado di su gestion y e cumplimiento di su promesa. Minister Eman a cana hunto cu Juanita Kock y Sulieta Ramirez e subida cu awor ta mas facil y bunita danki na capa di asfalt cu a haya.

CARANAN CONTENTO

Un bes cu a yega na e parke, tabatin mas miembran di e comision ta ward'e pa sinta hunto gradici'e y combersa riba e diferencia grandi cu e trabou di infraestructura aki a haci pa e parke y pa e vecindario. Caranan contento di Michael y Juliana Becker como tambe Francisca Koolman no por a sconde e satis-

faccion cu finalmente tin un gobierno cu a haci nan anhelo un realidad.

BUNITA INICIATIVA

Di parti di Gabinete Mike Eman, tabata un placer di por a cumpli cu e peticion di e grupo. "E ta un bario cu ta haci pa otronan tambe disfruta. E ta un iniciativa bunita caminda bisiñanan ta bin hunto. Pa nos no tabata algo pa cumpli, pero mas bien un deber," tabata e palabranan di Prome Minister Mike Eman. Hunto cu esey e mandatario a expresa su deseo cu awor cu e parke tin un bon via di acceso, companianan priva lo tene nan mas na cuenta pa duna un sosten y/of donacion mescos cu por ehempel ta e caso cu Parke di Luz di Sero Preto.

Den un ambiente masha agradabel na e parke, Prome Minister Eman a combersa cu e diferente miembran di e comision ademas di bisiñanan di e bario cu tabata yega pa topa cun'e. El a tende di e cambio grandi cu e caminda a



Prome Minister y algun habitante riba e caminda nobo basha na Warawara.

haci, y esey cu no a habri oficialmente ainda. Nan ta hopi contento cu awor busnan lo por yega facilmente pa trece gruponan grandi di bishitante na e parke.

SATISFACCION

Fuera di esey, a conta na Prome Minister con e hende-

nan di e area a cuminsa haci ehercicio. Na luga di bay cana den Parke Arikok, nan ta subi e sero na e caminda di asfalt nobo tur atardi. Sigur tabata un satisfaccion grandi di sa cu e trabou a keda bon haci y ta bon ricibi dor di esnan cu ta bay haci uzo di dje.

"Hopi bes den politica tin un efecto ora bo ta cumpli loke bo ta priminti. Pero e ta bay mas leu cu esey. E gobernacion di un pais ta basa riba confianza," Prome Minister a bisa. "Nos ta sinti nos mes honra ora cu ciudadanonan bisa cu 'bo a cumpli' pero ta bon tambe pa e sistema constitucional cu e ciudadanía tin confianza cu esnan cu nan a duna e responsabilidad, ta haci nan trabou," el a conclui bisando. Prome Minister ta gradici e sosten y cooperacion cu el a ricibi di su colega Minister di Infraestructura Benny Sevinger, como tambe di e ingeniero y trahadonan di Departamentonan di Obran Publico den haci e logro aki posibel. Den nomber di Gabinete Mike Eman ta felicita vecindario di Warawara y distrito di Santa Cruz cu nan caminda nobo y ta invita henter pueblo di Aruba pa bin celebra e apertura oficial di Parke di Luz Warawara diabierna 7 di december proximo. □